



MESSADI

per la votaziun digl

1. da settember 2017 davart la reuniun dallas pleivs da
Cumbel/Peiden, Lumbrein, Suraua e Vrin



Cuntegn

Introducziun e survesta	4–10
Contract da reuniun	11–12
Constituziun dalla pleiv catolica romana da Lumnezia	13–19
Reglament da salarisaziun	20–21
Lescha da taglia	22

Prefaziun

Preziadas parochianas, prezai parochians

Vus obtenis oz il messadi per la votaziun digl 1. da settember 2017. Quella broschura duei informar vus sur digl entir project da reuniun dallas las pleivs da Cumbel/Peiden, Lumbrein, Suraua e Vrin.

Suenter in liung temps da ponderaziun e preparaziun han las suprastonzas dallas pleivs da Cumbel/Peiden, Lumbrein, Suraua e Vrin presentau a lur radunonzas da pleiv la fin da mars 2017 il project da reuniun. Il project ei vegnius suttamess ad ina votaziun per dar allas suprastonzas glich verda da cuntinuar. Las votaziuns ein curdadas ora en favur dil project instradaus. La suprastonza transitoria ha survegniu l'incumbensa da cuntinuar cun la lavur e preparar tut ils acts per ils proxims pass.


Clara finamira avon egl

La finamira ei che la pleiv nova duei esser en vigur sin l'entschatta schaner 2018. L'intenziun dallas suprastonzas dallas pleivs existentas ei da rinforzar e promover el rom da nossas cumpetenzas ils interess, la collaboraziun e l'administraziun dallas pleivs da Cumbel/Peiden, Lumbrein, Suraua e Vrin. Plinavon vulein nus crear in circuit pastoral e garantir ils survetschs divins els vitgs. Cun in diember da rodund 900 commembers ei la pleiv nova gronda e ferma per exister bein egl avegnir.

Il num

Nus havein ditg studegiu vid in num adattau per la pleiv nova; Pleiv catolica-romana da Lumnezia per Cumbel-Peiden, Lumbrein, Suraua e Vrin. Pleiv catolica-romana da Lumnezia dadens e dado ni Pleiv catolica-romana da Lumnezia decentrala, che fuss staus geograficamein fetg diffus e buca duvrels. Aschia havein nus decidiu per il sempel e bi num; Pleiv catolica-romana da Lumnezia. El decuors dil proxim temps vegnin nus a crear in sigil per la pleiv nova.

Organisaziun dalla pleiv catolica-romana da Lumnezia



Unir las pleivs

Nus plidein d'ina reuniun dallas pleivs e buca d'ina fusiun. Daco? Pleivs san – tenor il dretg canonic (dalla Baseligia) – buca sefusiunar (ir si ina en l'otra), mobein mo formar ina unitad pastorala da pleivs che restan giuridicamein independentas. Quei che nus capin sut reuniun – e vulein era cun quei – ei nuot auter ch'ina organisaziun da cooperaziun pastorala. Anovians vegn tala adina taxada sco ina fusiun. Las pleivs da Surcasti, Uors, Tersnaus e Camuns han fatg quei pass igl onn 2011. Mintga pleiv sto seorganisar sco ina vischnaunca politica. Per quei intent relai la pleiv ina constituziun. En tala vegn l'entira organisaziun determinada. La constituziun sto vegnir approvada dalla Baseligia catolica dil cantun Grischun.

Las pervendas restan

La pleiv ei buca la pervenda. Suletamein igl uestgiu savess reunir las pervendas. Denter las pleivs da Cumbel e Peiden ei quei stau il cass igl onn 2010. La pervenda sto ademplir l'incumbensa d'annunziaziun pastorala sin ils suandonts camps fundamentals: Liturgia, diaconia, intermediaziun dalla cardientscha e la cuminonza. Cun nossa reuniun creain nus era in circuit pastoral. Las pervendas restan e fuorman la basa materiala tras las fundaziuns da tut quei ch'ei vegniu fatg si zacu (fondos e funs) alla baseligia. Denter auter per salarisar il plevon e mantener ils edificis sacralis cun tut quei che s'auda tier.

Tut il possess dalla pervenda stat e sto vegnir administrau separadamein. Igl ei buca lubiu da metter beins e facultads dallas pervendas ensemen e far in quen. Quei ei era bien aschia, autramein profitassen pleivs da quei ch'ei in summa buca lur ed ins fagess encurter alla veglia ed intenziun da tuts quels benefactors che han fatg si lur rauba ni funs mo a lur pleiv.

La midada el sistem d'ulivaziun

Ils 26 d'october 2014 ha il parlament dalla Baseligia cantunala dil cantun Grischun approvau la midada dall'ordinaziun davart l'administraziun da finanzas. Cun igl 1. da schaner 2015 ei tala ida en vigur. Quella decisiun para sin l'emprema egliada in summa buca spettaculara. Denton per singulas pleivs, pia per tut las pleivs cun dameins che 600 commembers significhescha quella reducziun dallas contribuziuns deficits annuals. Las singulas pleivs han giu treis onns temps da seorganisar.

Tgi che viva dalla speranza, miera dalla plaronza. Detg pli modern, tgi che viva dalla speranza, saulta senza musica. Pia, per las suprastonzas dallas pleivs eis ei stau clar, che nus stuein encurir ils discuors cun nossas pleivs vischinontas ed instradar mesiras.

Finamiras dalla nova ordinaziun da finanzas

La Baseligia cantunala dil cantun Grischun ha adina dameins daners da reparter allas pleivs catolicas dil cantun Grischun. Ils motivs ein gie enconuschents. Aschia ha ella stuiu ir sur ils cudischs e formulau denter auter las suandonts finamiras:

- rinforzar la responsabladad da mintga pleiv
- buca sorprender deficits dallas pleivs
- repartiziun dils daners ord l'ulivaziun da finanzas sin dapli catolics
- promover reuniuns da pleivs cun contribuziuns finanzialas

Tschercau il discuors

Gia la primavera 2015 ein tut las pleivs dalla Lumnezia s'entupadas per emprems discuors cun l'intenziun da s'avischinar. Sedutas communablas cun la Pleiv da Lumnezia- miez sco era cun la cumissiun administrativa dalla Baseligia cantunala han giu liug. Damai che Lumnezia-miez ha gia fusiunau igl onn 2013 ei il punct da partenza per ina reuniun ni fusiun sur l'entira val staus tut auter che sempels. Da gliez temps patertgavan neginas dallas ulteriuras pleivs sur da reuniuns, negins indezis havessen lezza gada plidau persuenter. Il settember 2015 ein las suprastonzas dallas pleivs da Cumbel/Peiden, Lumbrein, Morissen, Suraua e Vrin sedecididas da luvrar vid in project communabel per ina secunda pleiv en Lumnezia.

Anflar il dretg caraun

Ferton ch'`enqualin havess viu bugen ina suletta pleiv en Lumnezia, naven da Cumbel tochen Vrin, analog alla vischnaunca politica, ein ils parochians i d'accord cun igl andament che la cumissiun da preparaziun ha proponiu allas radunonzas da pleiv la primavera 2017. Cun ir la via semplia e sefusiunar cun Lumnezia-miez havessen nus buca priu serius nossa responsabladad. Igl ei fact che pleivs alla periferia han da cumbatter cun auters quitaus che pleivs che schain el center.

Cussegl administrativ ignorescha nos quitaus

La cummissiun administrativa, cun sgr. Placi Berther alla testa, vesa quei tut auter e vul per tut prezi sfurzar atras ina fusiun sur l'entira val. Nos arguments che plaidan per ina secunda pleiv han els ignorau e sbittau cun beffa. Ins patratgi mo vid il manteniment da tuts varga 30 objects sacrali en nossa val. Cun mo ina pleiv en Lumenzia spargna la Baselia catolica dil cantun Grischun ina fetg gronda summa daners da contribuziun. Inagada dapli riessen pleivs beinstontas che obtegnan da niev ord l'ulivaziun nova da finanzas daners ch'els gnanc basegnan.

La vischnaunca da Pleiv da Lumnezia-miez ha all'entschatta dil process da reuniun signalisau promptad per ulteriuras reuniuns, denton mo sut certas cundiziuns. Il davos temps, suenter che la fusiun cun Morissen ei stada instradada il fevrer vargau e terminada en temps fetg sportiv, ha il vent denton midau direcziun e la cultura da beinvegni ei buca stada pli schi cordiala e palpabla.

Mantener usits e tradiziuns

Nus essan pertscharts che nus vegnin buca da frenar il svilup hodiern ellas baselgias ed en nossas pleivs. Denton vulein nus empruar da nutrir la veta, la cuminonza e la cultura en nossas pleivs. Nus vulein mantener nos usits, nossas tradiziuns, nossas fiastas ecclesiasticas, seigi quei enta Vrin ni vi Camuns. La suprastanza ed ils funcziunaris san dar en la direcziun ed empruar da tener ensemen la cuminonza dil parochians. Denton per ch'ina pleiv resta activa, vitala ed attractiva drova ei tuts. Processiuns e perdanonzas sa ei mo dar sche biars segidan ed aunc daplirs prendan part devoziusamein. - Lein selegrar sche la baselia ei miez pleina e buca mo adina selamentar che la baselia seigi miez vita.

La pastoraziun

La pastoraziun ei il pli impurtont per nossa ierta religiosa e per nossa cardientscha. Igl ei essenzial da contonscher giuven e vegl en nossa cuminonza cristiana. La baselia resta el vitg, quei ei fact. Igl ei semussau ch'els parochians van il pli bugen a messa en lur vitg. Aschia drova ei era in plevon ch'ei responsabels per la pastoraziun da nossa pleiv nova. Sur Markus Domeisen vegn a sorprender en in pensum cumplein la Pleiv catolica-romana da Lumnezia. Sur Albert Riederer vegn a sustener sur Markus cun celebrar survetschs divins la dumengia. Previu ei da saver porscher la dumengia en mintga pleiv anteriura in survetsch divin. Egl avegnir sa quella purschida denton vegnir adattada als basegns ed allas forzas da lavur. Per sustener il plevon ella lavur d'administraziun vegnin nus a crear in post da secretariat en piazza parziala.

Cussegl pastoral

Per sustener il plevon en damondas da pastoraziun, formaziun e collaboraziun vegn formau in cussegl pastoral. Plinavon segidan ils commembers tier fiastas profanas ed ecclesiasticas. Il cussegl pastoral fa la colligaziun dil pievel tiel plevon. Mintga vischinadi duei vegnir representaus cun in tochen dus commembers en quei gremium. Ina persuna dalla suprastanza sesa el cussegl pastoral. Persunas interessadas per quei cussegl pastoral duein s'annunziar tier lur president dalla pleiv.

Dumengia alva e Creisma

Damai che Dumengia alva e Creisma ein duas dallas pli bialas fiastas dalla baselia e dalla famiglia eis ei in ferm desideri da saver menar tras talas fiastas en nos vitgs. Dapi in onn frequentan tuts affons lumnezians las scolas ensemen. L'entira preparaziun dil affons e geniturs vegn ad haver liug communablamein. La fiasta sco tala ha liug en in turnus logic a Cumbel, Lumbrein, Suraua ni Vrin. Quella regulaziun duei esser en vigur schiditg che nus havein in diember sufficient d'affons a Cumbel, Lumbrein, Suraua e Vrin. A liunga vesta eis ei denton realistic e giavischabel da celebrar talas fiastas ensemen en in turnus denter la vischnaunca da Pleiv Lumnezia-miez e nossa pleiv nova.

Affittaziun da schischom / Funs pervenda

Il regulativ che regla l'affittaziun dil schischom en proprietad dalla pleiv nova e sias fundaziuns vegn elaboraus da niev. Aschiditg che quei regulativ ei buca en vigur cuoran ils contracts vinavon ed ei vala il status quo.

Colloporaziun cun uniuns e societads

La pleiv nova giavischa ina stretga collaboraziun cun las uniuns da dunnas, uniuns da giuventetgna, las societads da musica ed ils chors. Per lur prestaziun obtegnan tuts ina contribuziun.

Calusters, ugaus e tuts funcziunaris

Tut las personas ch'occupan in uffeci ni in pensum per las pleivs ein supplicadas tier ina reuniun dallas quater pleivs da star fideivlas a lur post. Per ademplir nos pensums drova ei tuts.

Aspects finansials

Bilanza

En la survesta dalla bilanza dallas pleivs per ils 31-12-2016 vegn mussau si ina solida situaziun finanziaria dallas pleivs da Cumbel/Peiden, Lumbrein, Suraua e Vrin. Mintga singula pleiv ha in agen capital sufficient ella reserva. Las quater pleivs han paucs deivets, aschia che la situaziun finanziaria da tuttas quater pleivs ei buna. La nova pleiv sa aschia arver la bilanza per igl 1. da schaner 2018 cun ina gronda reserva da capital. Era las fundaziuns da baselgias e capluttas possedan pulitas reservas per curclar eventuals cuosts da investiziuns futuras. Legats existan a Lumbrein ed a Vrin.

Pleiv	Cumbel/Peiden	Lumbrein	Suraua	Vrin	Total
Activa (pleiv e fundaziuns)	747 719.86	727 619.88	888 412.95	729 642.81	3 093 395.50
Crediturs dalla pleiv	115 501.50	21 493.00	7 580.30	11 891.15	156 465.95
Fondo messas	75 200.00	115 300.00	147 583.90	125 854.96	463 938.86
Legats/diversas reservas	0.00	94 441.95	0.00	102 622.69	197 064.64
Fundaziuns	478 838.06	353 631.37	445 260.97	240 334.74	1 518 065.14
Agen capital dalla pleiv	78 180.30	142 753.56	287 987.78	248 939.27	757 860.91

Quen administrativ

Las expensas principalas dalla pleiv reunida vegnan ad esser ils cuosts da pastoraziun, instrucziun da religiun, administraziun, cuosts da persunal ed ils cuosts currents per las baselgias. Las casas pervenda sco era ulteriuras immobilias ein affittadas, aschia san ils cuosts da quels objects per ordinari vegnir curclai cun las entradas da tscheins. La casa pervenda a Lumbrein stat a disposiziun al plevon. Cun las entradas da taglia da rodund 170'000.- francs, cun la contribuziun annuala dalla Baselia cantunala (Corpus Catholicum) da ca. 85'000.- francs sco era cun ulteriuras entradas san las expensas vegnir curcladas. Per ils proxims onns san ins aschia quintar cun quens annuals ulvai. Duess ei tuttina dar in onn ni l'auter dapli expensas ch'entras, ei igl agen capital dalla nova pleiv gronds avunda per curclar in eventual deficit.

Contribuziun unica per la reuniun dallas pleivs

Tenor il niev reglament d'ulivaziun da finanzas vegnan fusiuns/reuniuns da pleivs sustenidas finanziamein entras la Baselia cantunala (Corpus Catholicum) cun 400.- francs per parochian e cun 10'000.- francs per mintga pleiv. Per la reuniun da nossas quater pleivs fuss quei ina contribuziun unica da rodund 400'000.- francs. Quella contribuziun ei el mument denton aunc buca segirada. Denton, tenor igl artechel 22 dalla ordinaziun dallas contribuziuns da fusiun dalla Baselia catolica dil cantun Grischun ademplin nus tuts ils criteris per haver il dretg sin la contribuziun. Nus vegnin a cumbatter vehementamein per nos dretgs. Emprems pass en caussa ein gia instradai.

Pei da taglia

En vesta alla buna situaziun finanziaria dallas quater pleivs ed aschliensch che las entradas restan sco previu, savein nus quintar da schar il pei da taglia dalla nova pleiv era per ils proxims onns sin 15 %. Quei ei il pli bass pei da taglia per saver retrer la cumpleina contribuziun annuala dalla Baselia cantunala dil cantun Grischun (Corpus Catholicum).

Fundaziuns/fondos/legats

La nova pleiv vegn era a menar ils quens dallas fundaziuns ecclesiasticas, dil fondos e dil legats. La facultad vegn integrada ella bilanza dalla pleiv. Quellas reservas vegnan mussadas ora ella bilanza tier las passivas. Aschia vegn la facultad dallas fundaziuns, dil fondos e dil legats garantida. Era novas donaziuns vegnan aschia impundidas en favor digl intent definiu dil benefactor ni dalla benefactura.

Survesta davart las investiziuns previdas tochen igl onn 2020

Cumbel:	Revisiun totala dall'orgla, cuosts ca. 30'000.- francs Aunc buca decidiu, realisaziun 2019
Lumbrein:	Sanaziun dil mir entuorn la caplutta da s.Roc, cuosts ca. 30'000.- francs Aunc buca decidiu, realisaziun 2018
Suraua:	Avertura dil quartier Lorta, cuosts ca. 65'000.- francs Gia decidiu e vegn realisau els onns 2017-2018
Vrin:	Sanaziun dil tetg dalla baselgia parochiala, cuosts ca. 250'000.- francs Cuosts restonts ca. 100'000.- francs, gia decidiu e vegn realisau egl onn 2017

Nossas baselgias e capluttas

Baselgias e capluttas sil territori dalla Pleiv catolica-romana da Lumnezia

Cumbel/ Peiden

		Erregida	Davosa renovaziun
Baselgia parochiala	Sogn Stefan, Cumbel	1689	2005-06
Baselgia	Ss. Trinidad, Peiden	1880/90	1981-82
Caplutta	S. Murezi, Valgronda	1716	1996-98
Caplutta	Nossadunna, Cumbel	1928	2016
Caplutta	S. Gliezi, Peiden-Bogn	1510	1998

Lumbrein

Baselgia parochiala	Sogn Martin, Lumbrein	1646	2009-11
Baselgia	S. Clau e s. Onna, Surin	1595	1982/84
Caplutta	S. Roc, Lumbrein	1628/29	1965
Caplutta	Nossadunna, Lumbrein	1849	1967-70
Caplutta	S. Andriu, Sogn Andriu	1666	1975
Caplutta	S. Bistgaun, Silgin	1500	1999

Suraua

Baselgia parochiala	Sogn Luregn, Surcasti	1520	1984
Baselgia parochiala	Sogn Balun, Tersnaus	1670	1986
Baselgia parochiala	Sogn Gion, Camuns	1600	2005
Caplutta	S. Giusep, Surcasti	1689	1995
Caplutta	S. Carli, Uors	1616	2005
Caplutta	S. Catrina, Tersnaus	1759	1990

Vrin

Baselgia parochiala	Nossadunna e S. Gion Battesta, Vrin	1689-94	1984
Caplutta	S. Gion e s. Paul, Vanescha	1684	1990
Caplutta	S. Valentin e s. Barclamiu, Puzsatsch	1643	1990
Caplutta	S. Giusep, Sogn Giusep	1716	1995
Caplutta	Ss. Trinidad, Cons	1740	1990

Nossas casas pervendas e habitaziuns

Cumbel/ Peiden

	Erregida	Renovaziun	
Casa pervenda, Cumbel	1953	2003	Affittada
Casa pervenda, Peiden	1861	1987-88	Affittada
Garaschas a Peiden		1990	Affittadas
Garascha a Cumbel		1953	Affittada

Lumbrein

Casa pervenda, Lumbrein	1830	1969	intern	Habitada da sur Markus Domeisen
		1979	extern	
Casa pervenda, Surin	1800	1946	Vendida 1971	
Habitaziun da 2 stanzas La Muota	1987		Artau 2012	Affittada

Suraua

Casa pervenda, Uors	1971	2006/15		Affittada
Baghetg Puoz sut	1966			Affittaus

Vrin

Casa pervenda, Vrin	1738	1985		Affittada
Casa Gali, Ligjaziun	1678	1998		Affittada
Garaschas	1900	1970		Affittadas
Tualetta/lentischi/clavau				Affittai

Funs dalla pervenda e clavaus

Cumbel/Peiden

Terren agricol	11.34	ha
Terren en zona da baghegiar	0	a
Contracts cun fittaders avon maun	gie	
Diember da fittaders funs pervenda	5	
Diember clavaus/baghetgs	7	

Lumbrein

Terren agricol	20.25	ha
Terren en zona da baghegiar	77	a
Contracts cun fittaders avon maun	gie	
Diember da fittaders funs pervenda	14	
Diember clavaus/baghetgs	6	

Suraua

Terren agricol	25.5	ha
Terren en zona da baghegiar	12.58	a
Contracts cun fittaders avon maun	gie	
Diember da fittaders funs pervenda	16	
Diember clavaus/baghetgs	8	

Vrin

Terren agricol	8.5	ha
Terren en zona da baghegiar	6.7	a
Contracts cun fittaders avon maun	gie	
Diember da fittaders funs pervenda	8	
Diember clavaus/baghetgs	2	

Radunonzas dallas pleivs

Allas radunonzas dallas pleivs la primavera 2017 ein las parochianas ed ils parochians gia vegni informai sur dallas raschuns che plaidan per ina reuniun, pia per ina secunda pleiv en Lumnezia. Las radunonzas da pleiv han incaricau la suprastanza transitoria da preparar la reuniun dallas 4 pleivs da Cumbel/Peiden, Lumbrein, Suraua e Vrin e suttametter quella allas radunonzas extraordinarias da pleiv per decisiun. La radunonza extraordinaria ha liug igl 1. da settember 2017 en mintga vischinadi. Principalmein va ei per decider sur dil contract da reuniun. La gliesta da tractandas definitiva vegn publicada a dretg temps.

Proposta dalla suprastanza transitoria

La suprastanza transitoria propona a votantas e votants d'approbar il contract da reuniun.

Per la suprastanza transitoria

Cumbel/Peiden: Fidel Arpagaus, president; Rudolf Caduff, cassier
Lumbrein: Alexander Casanova, president e meinaproject, Nicolaus Solèr, actuar
Suraua: Simon Derungs, president; Leo Derungs, actuar
Vrin: Erwin Caviezel, president; Andrea Caminada, cassiera

Proxims pass suenter la decisun da reuniun

Vegn la reuniun dallas pleivs da Cumbel/Peiden, Lumbrein, Suraua e Vrin approbada, cloma la suprastanza transitoria ils **3 november 2017** alla radunonza constitutiva dalla pleiv nova e suttametta a quella las suandontas tractandas:

- Approbaziun dalla constituziun dalla pleiv
- Approbaziun dalla lescha da taglia
- Fixar il pei da taglia
- Approbaziun dil reglament da salarisaziun
- Elecziun dalla suprastanza
- Elecziun dalla cumissiun da quen e gestiun
- Autras tractandas necessarias

Contract da reuniun denter las pleivs da Cumbel/Peiden, Lumbrein, Suraua e Vrin

Determinaziuns generalas

Art. 1 Reuniun

Las pleivs da Cumbel/Peiden, Lumbrein, Suraua e Vrin s'uneschan cun igl 1. da schaner 2018 el senn digl art. 87 dalla lescha da vischnaucas dil cantun Grischun applicada analogamein.

Art. 2 Num e territori

La pleiv reunida porta il num « Pleiv catolica-romana da Lumnezia » e secumpona dallas quater pleivs anteriuras da Cumbel/Peiden, Lumbrein, Suraua e Vrin cun lur uclaus sin territori dalla vischnaunca Lumnezia.

Art. 3 Entrada en vigur

Cun resalva dall'approbaziun dalla constituziun entras la cumissiun administrativa dalla Baseligia cantunala dil cantun Grischun succeda la reuniun sin igl 1. da schaner 2018.

Effects giuridics dalla reuniun

Art. 4 Successiun universala

La pleiv nova surpren ils dretgs e tuttas obligaziuns giuridicas dallas pleivs anteriuras.

Ella surpren tuttas activas e passivas, l'entira facultad, tuts dretgs e pensums sco era tuttas obligaziuns e pretensiuns dallas pleivs anteriuras.

Naven digl 1. da schaner 2018 vegn menau in niev quen per la Pleiv catolica-romana da Lumnezia. En quel vegnan las facultads dallas pleivs anteriuras reunidas.

Art. 5 Dissoluziun da collaboraziuns

Eventualas collaboraziuns denter las pleivs anteriuras vegnan dissolidas cun ils 31 da december 2017.

Art. 6 Suprastanza da pleiv

La suprastanza dalla pleiv secumpona da 6 commembers (il president, il vicepresident/actuar, dus geraus, in cau da finanzas ed il plevon (en ex officio)). Las pleivs anteriuras han il dretg d'esser representadas ella suprastanza dalla pleiv nova cun silmeins in representant.

Quella regulaziun duei valer schi ditg sco igl ei pusseivel da tschamer mintgamai in representant ord la pleiv anteriura.

Art. 7 Sedia

La sedia dalla pleiv ei mintgamai il liug da domicil dil president.

Art. 8 Fundaziuns ecclesiasticas

Las fundaziuns ecclesiasticas cun lur facultad restan vinavon autonomas e vegnan administradas naven dalla vigur dalla pleiv nova tenor vegl dretg ed isonza, sebasond sin art 59 al. 1 dil Cudisch civil Svizer.

Art. 9 Affittaziun da terren

Da principi valan per tut ils purs e cultivaders da beins dallas pleivs anteriuras e dallas fundaziuns ecclesiasticas ils medems dretgs enteifer la pleiv nova. Igl emprem dretg sin ina affittaziun dil fons pervenda han ils purs che habiteschan el vischinadi nua ch'il fons dalla pervenda sesanfla. Per l'affittaziun futura dil schischom vegn relaschau ulteriuramein in reglament corrispudent. Schiditg che quei reglament ei buc en vigur, van ils tuts contracts existents vinavon tenor termin.

Procedura

Art. 10 Decisiun enteifer las pleivs

L'approbaziun dil present contract da reuniun succeda il medem mument a caschun dallas radunonzas da pleiv da Cumbel/Peiden, Lumbrein, Suraua e Vrin.

La reuniun va en vigur mo sche tuttas pleivs approbeschan il contract da reuniun senza midadas.

Reglamentaziuns transitorias

Art. 11 Suprastonza transitoria

Ils presidents dallas anteriuras pleivs sco era mintgamai in consuprastont fuorman ina suprastonza transitoria per las lavurs preparatoricas en connex cun la reuniun e per l'execuziun da tala. Ella resta en uffeci entochen ils 31 da december 2017 e seconstituescha sesezza.

Art. 12 Radunonza constitutiva

Vegn la reuniun decidida, cloma la suprastonza transitoria a dretg temps alla radunonza constitutiva dalla pleiv nova e sutta metta a tala ils suandonts puncts per approvaziun:

- constituziun dalla pleiv
- lescha da taglia
- reglament da salarisaziun
- elecziun dalla suprastonza
- elecziun dalla cumissiun da quen e gestiun
- fixar il pei da taglia
- autras tractandas necessarias

Art. 13 Radunonza da pleiv 2018

Aschi baul sco pusseivel egi onn 2018 cloma la nova suprastonza a l'emprema radunonza dalla «Pleiv catolica-romana da Lumnezia» cun las suandontas tractandas:

- protocol dalla radunonza constitutiva
- approvaziun dilis quens annuals 2017 dallas pleivs anteriuras, revedi entras las cumissiuns da quen e gestiun da talas
- approvaziun dilis protocols dallas pleivs anteriuras
- preventiv 2018
- autras tractandas necessarias

Art. 14 Dretg applicau

Duess buca tut la legislaziun dallas anteriuras pleivs esser unificada e remplazzada entras la legislaziun dalla pleiv nova entochen l'entrada en vigur dalla reuniun, applichescha la suprastonza transitoriamein la legislaziun dallas pleivs anteriuras mintgamai sin lur intschess.

Art. 15 Obligaziun da fideivladad

Entochen che la reuniun ei buca en vigur astgan las pleivs existentas surprender, respectiv concluder neginas expensas novas ch'ei en el mument dall'approvaziun dil contract da reuniun buca enconuschentas e ch' ei buca urgentas.

Approbaus dallas radunonzas da pleiv digl 1. da settember 2017

Pleiv da Cumbel/Peiden:

President

Actuara

Pleiv da Lumbrein:

President

Actuar

Pleiv da Suraua:

President

Actuar

Pleiv da Vrin:

President

Actuara

Constituziun

1. DISPOSIZIUNS GENERALAS

Concepziun

Art. 1

Sefundond sils artechels 98 e 99 dalla constituziun cantunala e sin ils art. 19 e suandonts dalla constituziun dalla Baseligia catolica dil cantun Grischun fuorman las persunas catolicas sesentas els vischinadis da Cumbel/Peiden, Lumbrein, Suraua e Vrin cun lur uclauns la Pleiv catolica-romana da Lumnezia (el text suandont: pleiv) La pleiv ei ina corporaziun autonoma dil dretg public.

La Pleiv catolica-romana da Lumnezia sin territori dalla vischnaunca Lumnezia cumpeggia igl entir territori dilis vischinadis da Cumbel/Peiden, Lumbrein, Suraua e Vrin.

Lungatg official

Art. 2

Il romontsch sursilvan ei il lungatg official dalla pleiv. El duess vegnir applicaus leu nua ch'igl ei pusseivel.

Intent

Art. 3

La Pleiv catolica-romana da Lumnezia

- procura per ils mieds necessaris per la pastoraziun e protegia la libertad digl operar pastoral.
- metta a disposiziun l'infrastructura religiusa.
- sestenta per ina collaboraziun en la pastoraziun surregionala e promova il bien contact denter ses parochians.
- promova vicendeivlamein relaziuns cun pleivs ed instituziuns buca catolicas e gida a sligiar pensums generals el spért ecumen.
- s'engascha era socialmein el senn dalla baseligia.
- administrescha e tgira las immobilias, ils beins, la facultad dalla pleiv e dallas fundaziuns.
- representa ils interess da ses parochians envers las autoritads ecclesiasticas e publicas.

Commembers

Art. 4

Commembers dalla pleiv ein, senza differenza da naziunalitad e dil dretg da burghais, tuttas persunas da confessiun roman-catolica che habiteschan els sura numnai vischinadis.

L'extrada ord la pleiv vegn renconuschida mo sin fundament d'ina declaronza a scret per mauns dalla suprastonza da pleiv. Ella dispensescha dallas obligaziuns finanziaias. L'extrada entra en vigur il di suenter la retschevida dalla brev.

Egualitad dalla schlatteina

Art. 5

Las indicaziuns davart las persunas, las funcziuns e las professiuns en quella constituziun serefereschon ad omisduas schlatteinas, aschilunsch ch'ei seresulta buca enzatgei auter ord il senn dalla constituziun.

Pussonza suprema

Art. 6

Enteifer la pleiv possedan ils votants la pussonza suprema. Il dretg da votar han parochians catolics (commembers) che possedan il dretg da votar en ils vischinadis ni ch'ei en posses d'ina lubientscha da domicil sco persunas da naziunalitad jastra.

Eligibladad

Art. 7

Scadina persuna dalla pleiv cul dretg da votar sa vegnir elegida en in uffeci ni ina cumissiun. En in gremi consultativ san era persunas ordeifer igl intschess dalla pleiv vegnir elegidas.

Exclusiun	<p>Art. 8 Parents en lingia directa e quina, consorts e fargliuns sco era persunas che vivan en in partenadi registrau u en ina effectiva cuminonza da veta astgan buca appartener il medem mument al medem organ dalla pleiv ni alla suprastanza ni alla cumissiun da gestiun.</p>
Perioda e limitaziun d'uffeci, surdada d'uffeci	<p>Art. 9 La perioda d'uffeci cuoza 3 onns per tut ils officials dalla pleiv. Ei exista negina limitaziun dil temps d'uffeci.</p> <p>La demissiun ei d'inoltrar a scret alla suprastanza da pleiv e quei sil pli tard sin ils 31.12. digl onn avon la radunonza d'elecziuns.</p>
Secret d'uffeci	<p>Art. 10 Ils commembers d'organs e cumissiuns sco era ils funcziunaris dalla pleiv ein suttamess al secret d'uffeci.</p>
Recusaziun	<p>Art. 11 Il commember d'in organ dalla pleiv, d'ina cumissiun ei obligaus da prender stgisa tier ina votaziun e tractandas, sch'ina fatschenta pertucca el sez, ni sch'in da ses parents tochen el grad menziunau egl artechel 8 ha interess persunal direct en caussa. En cass da dispeta decida l'autoritat u cumissiun corrispundenta tgi che ha da prender stgisa.</p>

1.1 DRETGS DILS COMMEMPERS DALLA PLEIV

Ils commembers san sesurvir dils suondonts instruments democratics per separticipar activamein alla politica dalla pleiv.

Petiziuin	<p>Art. 12 Scadin commember dalla pleiv sa inoltrar propostas e petiziuns che pertuccan damondas specialas ni generalas dalla pleiv. Quellas ston vegnir fatgas a scret per mauns dalla suprastanza. La suprastanza ei obligada da prender posiziun a scret enteifer treis meins.</p>
Iniziativa	<p>Art. 13 In'iniziativa alla radunonza generala ei d'inoltrar a scret alla suprastanza cun motivaziun. Ella sto esser suttascretta da silmeins 30 votants. La suprastanza ei obligada da suttametter ina tala iniziativa enteifer sis meins alla radunonza da pleiv e quei ensemen cun ina posiziun ni eventualmein cun ina cunterproposta. L'iniziativa sa vegnir retratga dallas empremas treis persunas che han suttascret ella.</p>
Moziun	<p>Art. 14 Scadin votant ha il dretg da far propostas a caschun da radunonzas dalla pleiv era partenent fatschentas e caussas ch'ei buca publicadas silla gliesta da tractandas. Vegn ina tala proposta acceptada dalla radunonza sco moziun, sto la suprastanza suttametter rapport e proposta alla proxima radunonza da pleiv.</p>
Interpellaziun	<p>Art. 15 A caschun d'ina radunonza dalla pleiv sa scadin votant pretender sclariment dalla suprastanza pertuccont situaziun ni liquidaziun d'ina fatschenta. Quella sto buca star en connex cun las tractandas publicadas. La suprastanza sa rispunder sco suonda:</p> <ol style="list-style-type: none"> 1. immediat ni a caschun dalla proxima radunonza da pleiv 2. a scret enteifer 3 meins 3. refusar il sclariment sche interess impurtonts dalla pleiv ni da tiazas persunas giustificeschan quei.

Dretg da recuors	<p>Art. 16 Encunter conclus dalla suprastanza e dalla radunonza da pleiv sa vegnir recurriu enteifer 20 dis tier la cumissiun administrativa dil Corpus Catholicum tenor art. 25 ss. dalla Constituziun cantunala dalla Baselpgia catolica dil cantun Grischun.</p>
------------------	--

2. DISPOSIZIUNS ORGANISATORICAS

Organs dalla pleiv	<p>Art. 17 1. La radunonza da pleiv 2. La suprastanza 3. La cumissiun da quen e gestiun</p> <p>Il cussegl pastoral dalla pleiv ei in organ ecclesiastic. Sia funcziun, sias cumpe-tenzas e cumposiziun vegnan definidas en in regulativ separau.</p>
La radunonza da pleiv	<p>Art. 18 La radunonza ei igl organ suprem dalla pleiv. Ella cumpeggia ils parochians cun dretg da votar. La radunonza da pleiv duei haver liug igl emprem semester digl onn current.</p>
Cumpetenzza	<p>Art. 19 La radunonza da pleiv ha las suandontas cumpetenzas:</p> <ol style="list-style-type: none"> 1. elecziun dil plevon (tenor las perscripziuns ecclesiasticas) 2. elecziun dil president dalla pleiv e da 4 ulteriurs commembers da supras- tonza 3. elecziun da 2 commembers per la cumissiun da quen e gestiun 4. relasch e midada dalla constituziun e dalla lescha da taglia 5. approbar ils quens annuals, approbar il preventiv e fixar il pei da taglia 6. conclus davart expensas che survargan la cumpetenzza dalla suprastanza 7. decisiuns sur da damondas resalvadas expressivamein alla radunonza ni che vegnan suttamessas dalla suprastanza per decisiuns sur da cumpras, venditas, brats ed impegnaziuns dad immobilias e dils beins dalla pleiv 8. approbar regulativ da salarisaziun dils officials
Convocaziun	<p>Art. 20 La convocaziun a radunonzas ei da far silmeins 10 gis avon entras publicaziun ufficiala. Radunonzas extraordinarias vegnan convocadas sin giavisch da silmeins 30 commembers dalla pleiv ni sche la suprastanza anfla ei per neccessari.</p>
Cumpetenzza da conclus	<p>Art. 21 La radunonza sa concluder sch'ella ei convocada el senn da questa constituziun. Tuttas tractandas ein da predeliberar dalla suprastanza. Tractandas che vegnan proponidas per a caschun dalla radunonza vegnan surdadas alla suprastanza per l'examinaziun preliminar.</p> <p>Per regla vegn ei decidiu cun maunpli, nun ch'ina quarta dils votants presents pretendan scrutini. Cedels vits e nunvaleivels vegnan buca quintai.</p> <p>Tier votaziuns cun scrutini vala igl absolut pli dallas vusch valeivlas (diember dallas vuschs valeivlas: 2+1).</p> <p>Ein las vuschs ulivas en cass da votaziun, ha il president la vusch da tagl. Ein las vuschs egualas en cass d'elecziun, decida la sort.</p>

2.1. SUPRASTONZA DA PLEIV

Cumposiziun

Art. 22

La suprapstozza ei igl organ executoric ed administrativ dalla pleiv.

Ella consista dil:

1. president
2. 4 ulteriurs commembers
3. plevon (ex officio)

La suprapstozza vegn elegida per treis onns dalla radunonza da pleiv e seconstituescha sesezza – priu ora il president.

Obligaziuns e cumpetenzas dalla suprapstozza

Art. 23

Las obligaziuns e cumpetenzas dalla suprapstozza ein:

1. representar la pleiv envers autoritads ecclesiasticas, cantunalas e communalas
2. preparar las fatschentas per mauns dalla radunonza ed exequir ils conclus
3. survegilar l'administraziun, menar il quen annual e preperar il preventiv
4. administrar las fundaziuns ed ils fondos
5. concluder sur d'expensas unicas entochen frs. 50'000.00 netto ed entochen frs. 10'000.00 netto sur d'expensas che serepetan onn per onn
6. menar process, recuors, serrar contracts e convenziuns risguardond litera e. Ei stat liber alla suprapstozza da suttaletter la damonda alla radunonza da pleiv
7. survegilar las extradadas ed entradas da commembers cun comunicar agl uffeci da taglia ed alla canzlia communal
8. fixar la paga dil plevon cun risguardar las directivas dalla Baselpgia catolica dil cantun Grischun e confirmar il contract
9. fixar la paga da tuts funcziunaris
10. cooperar tier l'execuziun dallas leschas, uordens e conclus
11. engaschar ils calusters, ils organists, igl archivar ed ils gidonters necessaris tenor basegns
12. eleger il cussegl pastoral
13. relaschar uordens, statuts, regulativs e reglaments
14. fixar il liug dalla radunonza da pleiv

President

Art. 24

Funcziun dils suprapstonts ed ulteriurs posts

Il president convochescha ed empeila las radunonzas da pleiv e las sesidas da suprapstozza. El segna ensemen cugl actuar protocols, contracts ed ulteriurs documents, cun il gerau dils beins e baghetgs ils contracts d'affitaziun, cun il gerau dallas immobilias ils contracts corrispundents. L'administraziun dalla pleiv ei suttamessa administrativamein al president.

En cass urgents sa el prender preventivamein decisiuns necessarias.

Actuar

Igl actuar scriva il protocol dalla radunonza da pleiv e dallas sedutas da suprapstozza. Il protocol ei da suttaletter alla proxima radunonza ni sesida per approbaziun. Igl actuar suttascriba ils conclus ensemen cun il president. Sco vicepresidente substituescha el il president.

Cau finanzas/ post da contabilitad

Il cau da finanzas ei responsabels per la facultad dalla pleiv e dallas fundaziuns, dils legats sco era dils fondos annuals. El ei responsabels per il quen annual e l'entira contabilitad. El ei responsabels per las pagas da tuts emploiai e funcziunaris. El incassescha ils tscheins dallas immobilias, dils beins e dil funs. El tschenta ensemen il quen annual ed il preventiv per mauns dalla suprapstozza e dalla radunonza da pleiv.

La lavur da menar la contabilitad sa era vegnir surdada ad ina tiarza persuna.

Geraus

Las funcziuns pli detagliadas dils ulteriurs suprapstonts (geraus) e dils ulteriurs uffecis enteifer la pleiv vegnan regladas en in reglament/carnet da duers separau.

Delegaziun

Art. 25

La suprapstozza sa delegar pensums specials al president, a singuls commembers, ad ulteriurs funcziunaris sco era ad ina cumissiun ni a tiarzas persunas per liquidaziun. Sur dil resultat han ils incumbensai da rapportar alla suprapstozza. En cass da pensums pli gronds redegia la suprapstozza in carnet da duers pils incumbensai.

Uorden da fatschenta

Art. 26

La suprapstozza serimna sin invit dil president ni sin pretensiun da 2 da ses commembers.

Ella sa concluder valeivlamein sche silmeins 3 commembers ein presents.

En cass da vuschs ulivas decida il president dalla sesida.

Conclus sin via circulara ein valeivels mo en cass d'unanimitad.

Scadin commember che fa part alla suprapstozza ei obligaus da votar.

Dretg da representar la pervenda/fundaziuns

Art. 27

Mintga pleiv anteriura dils vischinadis da Cumbel/Peiden, Lumbrein, Suraua e Vrin ha il dretg da representar lur pleiv e lur fundaziuns cun ina persuna en la suprapstozza dalla pleiv.

Stat negina persuna dil vischinadi a disposiziun per in uffeci a caschun dalla radunonza d'elecziuns, sa in interessau d'in auter vischinadi vegnir elegius.

Sedutas communalas

Art. 28

Tier decisiuns da pli gronda muntada sa la suprapstozza far ina seduta (consultativa) ensemen cun ils commembers dalla cumissiun da quen e gestiun, cun ils commembers dil cussegl pastoral ed ulteriuras persunas dil fatg.

Cussegl pastoral

Art. 29

Al cussegl pastoral fan commembers da mintga vischinadi part. Plinavon fan ils plevons part dil cussegl pastoral. In commember dalla suprapstozza sesa el cussegl pastoral.

Il cussegl pastoral vegn elegius tenor proposta dil plevon per mintgamai 3 onns dalla suprapstozza dalla pleiv e seconstituescha sesez.

Las incumbensas dil cussegl pastoral vegnan fixadas en in reglament separau entras la suprapstozza.

Cumissiun de quen e gestiun

Art. 30

La cumissiun da quen e gestiun secumpona da 2 commembers. Ella seconstituescha sezza.

Ils commembers dil post da revisiun examineschan annualmeins la contabilitad, il quen da menaschi, la bilanza sco era la facultad dallas fundaziuns e dils legats.

Els controlleschan la gestiun dalla pleiv.

Els dattan rapport a scret alla radunonza da pleiv.

L'incumbensa dil post da revisiun sa era vegnir surdada ad in post extern cumpetent.

2.2 FUNDAZIUNS

Fundaziuns	Art. 31 Alla pleiv appartegnan las suondontas fundaziuns ecclesiasticas che sebasan tenor la resalva per talas en artechel 59 alineas 1 dil cudisch civil svizzer dil dretg public cantunal e per munconza da tal e da prescripziuns davart dalla Baselgia cantunala sin questa constituziun ed il dretg d'isonza.
Cumbel/Peiden	Fundaziun ecclesiastica Baselgia parochiala Cumbel Fundaziun ecclesiastica Pervenda Cumbel Fundaziun ecclesiastica Calustria Cumbel Fundaziun ecclesiastica Caplutta Nossadunna, Cumbel Fundaziun ecclesiastica Baselgia e Pervenda s.Murezi, Cumbel Fundaziun ecclesiastica Pervenda Peiden Fundaziun ecclesiastica Baselgia ss. Trinidad, Peiden Fundaziun ecclesiastica Baselgia s.Glieci, Peiden-Bogn
Lumbrein	Fundaziun ecclesiastica Pervenda Lumbrein Fundaziun ecclesiastica Baselgia s.Martin Fundaziun ecclesiastica Calustria s.Martin Fundaziun ecclesiastica Caplutta Nossadunna Fundaziun ecclesiastica Calustria Nossadunna Fundaziun ecclesiastica Caplutta s.Roc Fundaziun ecclesiastica Calustria s.Roc Fundaziun ecclesiastica Caplutta s.Bistgaun Fundaziun ecclesiastica Calustria s.Bistgaun Fundaziun ecclesiastica Calustria Surin Fundaziun ecclesiastica Pervenda Surin Fundaziun ecclesiastica Caplutta s.Andriu Fundaziun ecclesiastica Calustria s.Andriu Fundaziun ecclesiastica Baselgia s.Clau
Suraua	Fundaziun ecclesiastica Pervenda Tersnaus Fundaziun ecclesiastica Calustria Tersnaus Fundaziun ecclesiastica Pervenda Camuns Fundaziun ecclesiastica Calustria Camuns Fundaziun ecclesiastica Pervenda Surcasti/Uors Fundaziun ecclesiastica Calustria Surcasti/Uors Fundaziun ecclesiastica Caplaria Uors Fundaziun ecclesiastica Baselgia parochiala s.Maria Madleina Fundaziun ecclesiastica Baselgia s.Giusep Fundaziun ecclesiastica Baselgia s.Luregn Fundaziun ecclesiastica Baselgia s.Gion Fundaziun ecclesiastica Caplutta s.Carli Fundaziun ecclesiastica Caplutta s.Catrina Fundaziun ecclesiastica s.Antoni, Camuns Fundaziun ecclesiastica s.Paul, Camuns
Vrin	Fundaziun ecclesiastica Baselgia parochiala Vrin Fundaziun ecclesiastica Pervenda Vrin Fundaziun ecclesiastica Calustria Vrin-Vitg Fundaziun ecclesiastica Casa pauperila Caminada-Galli Fundaziun ecclesiastica Caplutta s.Valentin Fundaziun ecclesiastica Calustria s.Valentin Fundaziun ecclesiastica Caplutta s.Giusep Fundaziun ecclesiastica Calustria s.Giusep Fundaziun ecclesiastica Calustria Vanescha Fundaziun ecclesiastica Calustria Cons Fundaziun ecclesiastica Caplutta Cons Fundaziun ecclesiastica Caplutta s.Gion e s.Paul

3. DISPOSIZIUNS FINANZIALAS

Administraziun dalla facultad	Art. 32 La pleiv procura per ina buna administraziun da siu fatg. Il quen da menaschi ei da serrar giu mintgamei per ils 31 da december e duei sebasar sin in saun fundament. La facultad dil fondos ei da plazzar cun segirezia sufficiente ed ei da mussar ora claramein per mintga singula fundaziun.
Taglias e taxas	Art. 33 Per cuvierar las expensas currentas dalla pleiv e sia administraziun incassescha la pleiv ina taglia da cultus. La lescha da taglia regla ils detagls.
Diever	Art. 34 La taglia vegn applicada per suondonts intents: cuvierar las expensas ord il menaschi dalla pleiv e las pervendas. l'erecziun ed il manteniment d'objects ch'ei en possess dalla pleiv. curclar eventuals deficits. Projects, lavur da giuventetgna, sentupadas, pelegrinadis etc. Donaziuns caritativas e basegns socials. Contribuziuns a chors, musicas ed uniuns per diversas prestaziuns.

4. DISPOSIZIUNS FINALAS

Recuors	Art. 35 Encunter conclus e decrets dalla suprastanza e dalla radunonza sa vegnir recurri enteifer 20 dis tier la cumissiun administrativa dalla Baselgia cantunala dil cantun Grischun tenor artechel 25 e suandonts dalla constituziun da quella.
Revisiun	Art. 36 Questa constituziun sa vegnir revedida da tut temps parzialmein ni cumpleinamein. Scadina revisiun sto vegnir suttamessa per l'approbaziun alla cumissiun administrativa dalla Baselgia cantunala dil cantun Grischun.
Vigur	Art. 37 Questa constituziun survegn vigur legala suenter esser acceptada dalla radunonza constitutiva dalla Pleiv catolica-romana da Lumnezia ed approbada dalla cumissiun administrativa dalla Baselgia cantunala dil cantun Grischun. Questa constituziun ei approbada entras la radunonza constitutiva dalla pleiv catolica-romana da Lumnezia dil 3 da november 2017

Il president: Igl actuar:

Approbau dalla cumissiun administrativa dalla Baselgia cantunala dil cantun Grischun

Il president: Igl actuar:

Reglament da salarisaziun

DETERMINAZIUNS GENERALAS

Intent	Art. 1 Il reglament da salarisaziun present normescha l'indemnisaziun dil officials, dils funcziunaris e commembers da cumissiuns dalla pleiv. Existan auters contracts ni regulaziuns valan tals.
Dretg subsidiar	Art. 2 Vegn ei stipulau nuot auter valan subsidiarmein la legislaziun da personal e las prescripziuns dall'ordinaziun davart la salarisaziun dil personal dil cantun Grischun.
Egualitad dallas schlatteinas	Art. 3 Las indicaziuns da personas, funcziuns officialas ed indicaziuns professiunalas en quest reglament serefereschon ad omisduas schlatteinas.
Assicuranzas e cuosts socials	Art. 4 1. Duront il temps da lavur per la pleiv ein ils officials e funcziunaris assicurai entras la pleiv encunter accident e responsabladad civila. 2. Da mintga indemnisaziun ad ina persuna privata vegn deducida sia cumpart allas assicuranzas dil provediment public sco era dil provediment professiunal (assicuranza da pensiun ed accident), aschilunschch'ei exista in'obligaziun da pagar contribuziuns. 3. La pleiv presta la cumpart sco patruna e renda quen allas cassas dallas assicuranzas socialas. 4. Subsidiarmein valan las prescripziuns dallas assicuranzas socialas.
Indemnisaziun suprastonza	Art. 5 1. Ils commembers dalla suprastonza dalla pleiv obtegnan las suandontas indemnisaziuns pauschalas ad onn: - President 4'000.00 frs - Vicepresident/actuar 1'500.00 frs - Gerau immobilias e beins 1'500.00 frs - Gerau edificis sacralis 1'500.00 frs - Cau finanzas 1'500.00 frs 2. Quellas indemnisaziuns pauschalas ad onn valan per tutta lavur, per uatgas, per la radunonza da pleiv sco era radunonzas extraordinarias che cumpetan ad els tenor constituiun ed uordens. Per sesidas da suprastonza, ulteriuras sesidas ed outra lavur extraordinaria obtegnan els ulteriuramein l'indemnisaziun tenor artechel 6. 3. L'indemnisaziun per la lavur da menar la contabilitad vegn fixada dalla suprastonza. 4. Ulteriur personal vegn indemnissaus tenor ils contracts fixai dalla suprastonza. 5. Lavur cumina vegn ordinada dalla suprastonza ed indemnissada cun 25.00 frs. per ura. 6. Il plevon obtegn negina indemnisaziun supplementara sco commember dalla suprastonza. L'indemnisaziun per sia lavur ei cuntenida ella salarisaziun tenor il contract da lavur.

Indemnisaziun per sesidas e lavur extraordinaria

Art. 6

Sesidas ed outra lavur extraordinaria che vegn prestada dalla suprastonza e da cumissiuns per la pleiv vegn indemnissada cun 30.00 frs per ura tenor il temps impundiu. Il viadi al plaz da lavur, resp.al liug da sesida vegn quintaus sco temps da lavur, sche quel sesanfla ordeifer igl intschess dalla vischnaunca Lumnezia.

Spesas

Art. 7

1. Per viadis cun ils mieds publics vegnan ils cuosts effectivs da secunda classa indemnissai.
2. Per viadis cun auto privat vegnan ils km indemnissai tenor la reglamentaziun cantunala.
3. Per l'indemnisaziun da dunsena e loschament valan las prescripziuns cantunalas.
4. Telefons, portos etc. vegnan indemnissai tenor cuosts effectivs.

DETERMINAZIUNS FINALAS

Quen

Art. 8

1. Per sesidas ed outra lavur extraordinaria che vegn prestada dalla suprastonza, dils funcziunaris e da cumissiuns eis ei da presentar in quen cun indicar cuortamein la lavur prestada.
2. Il quen vegn controllaus e visaus dil president dalla pleiv.

Cass dispiteivels

Art. 9

En cass dispiteivels decida la cumissiun da quen e gestiun davart l'indemnisaziun.

Midadas

Art. 10

La cumissiun da gestiun ha d'examinar quest regulativ silmeins mintga 3 onns ed ha da far alla radunonza da pleiv eventualas propostas per midadas ed alzaments.

Vigur

Art. 11

Quest regulativ va en vigur cun igl 1. da schaner 2018

Approbaus dalla radunonza constitutiva dalla Pleiv catolica-romana da Lumnezia dils 3 da november 2017.

Per la suprastonza tranistoria dalla Pleiv catolica-romana da Lumnezia

Il president:

Igl actuar:

Alexander Casanova

Fidel Arpagaus

Lescha da taglia

Pleiv catolica-romana da Lumnezia

Sebasond silla lescha davart las taglias communalas e las taglias da baselgia dil cantun Grischun relai la Pleiv catolica-romana da Lumnezia la suandonta lescha da taglia:

1. DISPOSIZIUNS GENERALAS

Object	Art. 1 La Pleiv catolica-romana da Lumnezia incassescha las suandontas taglias tenor las disposiziuns dil dretg cantunal: 1. ina taglia sin las entradas e sin la facultad; 2. ina taglia supplementara ed ina taglia penala.
Dretg subsidiar	Art. 2 Aschinavon che questa lescha cuntegn neginas regulaziuns vegn ei agiu conform al senn dallas disposiziuns dalla lescha davart las taglias communalas e las taglias da baselgia sco era conform alla lescha communalada da taglia ed alla lescha cantunala da taglia.

2. DRETG MATERIAL

Pei da taglia	Art. 3 Las taglias sin las entradas e sin la facultad vegnan incassadas en pertschiens dalla taglia cantunala sempli. La radunonza da pleiv fixescha sil pli tard il december il pei da taglia per igl onn fiscal suandont.
Subject da taglia	Art. 4 Tut las persunas catolicas sesentas el territori dalla Pleiv catolica-romana da Lumnezia ein obligadas da pagar taglia, plinavon tut las persunas catolicas che habiteschan ordeifer il territori dalla pleiv e ch'ei obligadas limitadamein da pagar taglia tenor il dretg cantunal alla Pleiv catolica-romana da Lumnezia. L'obligaziun da pagar taglia sedrezza ton tenor l'appartenenza ecclesiastica dallas singulas persunas ch'ei obligadas da pagar taglia sco era tenor las disposiziuns dalla lescha cantunala da taglia. En lètgs nua ch'is conjugals appartegnan a differentas confessiuns ston ils facturs totals vegnir reparti mintgamai per la mesadad sin omisdus conjugals.

3. DRETG FORMAL

Autoritads	Art. 5 Per exequir questa lescha ein las autoritads ch'ei incumbensadas cull'execuziun dallas taglias communalas cumpetentas - cun la resalva d'alineia 2. Davart l'obligaziun subjectiva da pagar taglia decida la suprastonza.
Scadenza ed incasso	Art. 6 Las taglias da baselgia scadan ensemen cun las taglias communalas. Ellas ston vegnir pagadas ensemen cun las taglias communalas.

4. DISPOSIZIUNS FINALAS

Entrada en vigur	Art. 7 Questa lescha ei vegnida approvada dalla radunonza constitutiva dalla Pleiv catolica-romana da Lumnezia dil 3 da november 2017. Ella entra en vigur igl'empre da schaner 2018. Cun l'entrada en vigur da questa lescha vegnan tuttas disposiziuns d'auters relaschs che stattan en cuntradiciun cun ella abolidas.
------------------	---

Per la suprastonza transitoria dalla Pleiv catolica-romana da Lumnezia

Il president: Alexander Casanova

Igl actuar: Fidel Arpagaus

